

Maysoûs Aussalèses 2 *Rougè de Cardolle. Reclams 1973. p.104* 184

... Maynat, que-y soy bachat û cop, despuch lou soum, per desastrugè, e que-m emplastrèy sus quàuquès oéus acoucoulatz au pè, frescs pounuts. Amics, quine mandilhade de cops de berret !

Aci qu'èy lou courtèlh deus betèyts, deus agnets, e hore de la bastisse, per lous darrès, û parcot, dab la sout deu porc. Lous bitoûs que pèchen enlà. E lou casau, praubet, bourdat de pèyre seque, qui hournéch lous legûmes de la soupe : quàuquè caulèt, pourrets, alh, cébes, peyrassilh, pimbou, piper, laurè. Chic de cause. Las patates que-s hasèn au cam, dab las mouñjes de picot qui èren arregades enter la milhoque. De qué arregoula-s. Lous Aussalés que n'abèn goâyre de goust enta d'aquets tribalhots..

Que bam tourna enta dehéns. Si l'escalè, coum p'at èy dit, èy dret, làrje, chens arrepos soumque au soulhet de daban la cousine, qu'èy permou que lou hé que-s carrèje en Aussau, à hèch, héns las lhéytères, e d'abiade que-y pujat dinquoio lou soulè de haut.

Qu'arribam dounc, à paupes, enta la porte de case. Que-ns bam ha en daban. Qu'èm à la cousine, granasse, espaciouse. Que cau place enta las esperouquères e àudez coundiès. Aci que-s y biu, que-s y debertéch e que-s y ploure. Au cor qu'èy lou larè, l'àmne casalère. « Lou hoéc qu'èy miéje bite » ça disen. Qu'èy soubén goardat per quàuquè hoegarè qui-s hasè bielh, pay-boû ou oûncou, atise-benedit ou Marie-brasoc. Bère troupe de cops que-m y souy cauhat e qu'aymerèy toustém aquere calou mayrau de l'oun soy badut